



Na osnovu člana 4. stav 2. Zakona o platama i ostalim naknadama sudija i tužilaca u Federaciji BiH („Službene novine Federacije BiH”, br. 72/05, 22/09, 55/13 i 61/22), a u vezi sa odredbama Poslovnika Visokog sudskog i tužilačkog Vijeća Bosne i Hercegovine („Službeni glasnik BiH”, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23 i 9/24), Visoko sudsko i tužilačko vijeće Bosne i Hercegovine, u sastavu, sudija Halil Lagumdžija, predsjednik Vijeća, sudija Aleksandra Obradović, potpredsjednica Vijeća, tužilac Sanin Bogunić, mr. Lejla Hadžić, tužilac Saša Sarajlić, tužilac Željka Fabić, sudija Ljiljana Bošnjak - Glizijan, advokat dr. sc Davor Martinović, sudija mr. Srđan Forca, sudija Mustafa Šabić, advokatica Amila Kunosić, tužilac Snježana Petković i tužilac Biljana Simeunović, na sjednici održanoj 17. i 18.07.2024. godine, donijelo je

O D L U K U

o imenovanju stručnog saradnika u Općinski sud u Širokom Brijegu

- I. Za stručnog saradnika u Općinski sud u Širokom Brijegu imenuje se **Galić Marko**.
- II. Imenovani stupa na dužnost 26.08.2024. godine.
- III. Ova odluka stupa na snagu danom donošenja i objavljuje se na internet stranici Vijeća.

O b r a z l o ž e n j e

Visoko sudsko i tužilačko vijeće Bosne i Hercegovine (u daljem tekstu: Vijeće) je dana 15.01.2024. godine, na internet stranici objavilo javni konkurs, broj: 04-07-3-188-1/2024, za 1 (jednu) upražnjenu poziciju stručnog saradnika u Općinskom sudu u Širokom Brijegu.

Nakon provedene konkursne procedure, nadležno podvijeće je dostavilo Vijeću rang listu kandidata, sa obrazloženim prijedlogom za imenovanje.

Na rang listi se našlo ukupno 19 (devetnaest) kandidata, a redosljed kandidata na rang listi je objavljen na zaštićenom dijelu internet stranice i dostupan je kandidatima koji učestvuju u konkursnoj proceduri.

Razmatrajući zaključenu rang listu kandidata i utvrđenu ocjenu razgovora, kao rezultat ocjenjivanja svih kriterija za imenovanje propisanih članom 72. Poslovnika VSTV-a BiH, Vijeće je odlučilo da za poziciju stručnog saradnika u Općinski sud u Širokom Brijegu imenuje kandidata na rang listi pod rednim brojem 3 Galić Marka.

Prilikom imenovanja kandidata na rang listi pod rednim brojem 3, Vijeće je imalo u vidu da su kandidati na rang listi pod rednim brojem 1 i 2 na jednoj od prethodnih sjednica Vijeća imenovani na druge oglašene pozicije stručnog saradnika. U odnosu na kandidatkinju na rang listi pod rednim brojem 4 koja je ostvarila identičnu ocjenu kao i imenovani kandidat, Vijeće je uzelo u obzir činjenicu da je navedena kandidatkinja na sjednici održanoj 15. i 16.05.2024. godine bila imenovana na navedenu poziciju, ali je Vijeće u skladu sa odredbama člana 74. stav (1) Poslovnika VSTV-a BiH na sjednici održanoj 28.06.2024. godine poništilo odluku o imenovanju.

Na razgovoru sa imenovanim kandidatom Komisija za obavljanje razgovora je ispitala kriterije iz člana 72. stav (1) i (2) Poslovnika VSTV-a BiH, koji se odnose na poznavanje relevantnih propisa i njihove primjene, sposobnost pravne analize, prosječna ocjena ostvarena za vrijeme studija, objavljeni naučni

radovi i druge aktivnosti u struci, prethodno iskustvo i radni rezultati i komunikativnost i sposobnost prezentiranja, kao i okolnosti koje su relevantne za utvrđivanje podobnosti kandidata za obavljanje poslova stručnog saradnika, pri čemu je po tom osnovu kandidat u konačnici ostvario ocjenu 3,7.

Vijeće je uzelo u obzir kvalifikacije, znanje i iskustvo imenovanog kandidata. Imenovani kandidat se istakao, između ostalih prijavljenih kandidata, sposobnošću razumijevanja i sistematičnog analiziranja pravnih problema, poznavanju relevantnih zakona i drugih propisa, sposobnosti da nepristrasno, savjesno, marljivo, odlučno i odgovorno obavlja dužnosti i poslove stručnog saradnika.

U pogledu radnog iskustva, Vijeće je imalo u vidu da imenovani kandidat od 2015. godine obavlja poslove državnog službenika u Vladi Zapadnohercegovačkog kantona. Trenutno obavlja poslove stručnog savjetnika za javne nabavke, a prije toga je obavljao poslove Višeg stručnog saradnika za pripremanje i realizaciju sjednica Vlade i sekretara Vlade. Prethodno zaposlenju u Vladi Zapadnohercegovačkog kantona imenovani kandidat je u periodu od 2011. g. do 2013. g. obavljao poslove pripravnika, volontera u Općinskom sudu u Širokom Brijegu.

Osim toga, Vijeće je imalo u vidu da je imenovani dana 02.12.2010. godine na Pravnom fakultetu Sveučilišta u Mostaru stekao akademsku titulu i zvanje magistra prava sa prosječnom ocjenom 3,39, te da je pravosudni ispit položio 20.01.2014. godine pred komisijom za polaganje pravosudnog ispita Ministarstva pravde BiH.

Vijeće je ocijenilo da je imenovani kandidat u potpunosti ispunio zakonom propisane uslove, kao i druge kriterije koji se cijene prilikom izbora kandidata, kako bi bio imenovan za stručnog saradnika u Općinski sud u Širokom Brijegu.

Imajući u vidu sve iznesene razloge, Vijeće je odlučilo kao u izreci ove odluke.

Broj: 04-07-3-2809-1/2024
Datum: 18.07.2024. godine

